

Li grosse bièsse

da Jean-Noël Fays

Bèbèrt. L'ome qu'i n' pout pus

Gusse. Li camaråde

Aumaye. Li vétérinaire

Sin.ne 1 : Gusse - Bèbèrt

Bèbèrt. Èt bin mi, dji pinse qui dj'aî co faîs ène bièssetrîye di vos choutè.

Gusse. Èt pouqwè don ?

Bèbèrt. Dj'aureu tos l' min.me bin ratindu qui m' docteur fuche riv'nu d' vacances ! Ça n'èsteut tos l' min.me nin si prèssè !

Gusse. Choute bin valèt, ça faît dès djoûs, nonfaît, dès samwin.nes qui vos m' rabachez lès-orèyes avou vos litanîyes : « dji n' d'è pou pu, dji n'î arive pus »!

Bèbèrt. Djè l' saî bin ! Mins tos l' min.me. Li docteur Aumaye, dji nè l' conè nin! Èt li, i n' mi conèt nin non pus.

Gusse. Djustemint ! Come ça, i n'aura pont d'idéyes totes faîtes. Pinsez ène miyète à Marguerite ! Vos m'avez co dit gn-a nin dîs minutes qu'èle ni s' djokeut nin d' bèrdèlè pace qui vos n' savîz pus l' fé !

Bèbèrt. Ayi ! Èt c'èst bin pou ça qu' dj' voureu bin qu' ça candje. Gn-aureut qu' mi, dji m'è foutereut.

Gusse. C'èst l' vraî qui si vos s'rîz tos seû, ça n'aureut wêre d'impôrtance. Mins vos-èstèz mariè m' fi. Èt vos d'vez tos fé pou rinde vos feume eûreûse.

Bèbèrt. Dji n' comprend nin ç' qu'i s' passe ! Dji n' su portant nin si vîy qu' ça savez ! Dji m' sin co djon.ne ! Mins gn-a rin à fé, dji n'î arive pus!

Gusse. C'èst pouqwè i n' vos faut pus taurdji à vèy li docteur. Dji n' pinse nin qu' vos-avez ène saqwè d' grâve ! Ça dwèt ièsse come qui direut « in blocadje » passager.

- Bèbèrt. Vos-avez auji à dîre vos : « in blocadje » passager ! Gn-a pus d' chîj mwès qu' ça deure.
- Gusse. Raîson d' pus pou n' nin taurdji. Pinsez à vo feume !
- Bèbèrt. Dji n' faî qu' ça ! Vos savez qu'èle m'a dit qu' si ça n' candjeut nin, èle freut appèl à ène saquî !
- Gusse. Nin l' vraî ?
- Bèbèrt. Come dji vos l' dit.
- Gusse. Èt vos s'riz d'acwârd ?
- Bèbèrt. Bin seûr qui non ! Vos s'riz d'acwârd vos d' vèy ène saquî prinde vos place ad'lé vo feume pou ...
- Gusse. Ah ça, jamais !
- Bèbèrt. Èt bin mi non pus. Si dj'èsteu malade ou bin stroupyi èt qui gn-aureut pus moyin, quékefiye bin ! Mins là, dji m' sin en plin.ne forme ... seûlemint, dji n' pou pus !
- Gusse. Ah, i m' chone qui dj'aî oyu ène saquî arivé ! Ça dwèt ièsse li docteûr. Dji m' vos va laîyi.
- Bèbèrt. Non, non ! D'meurè ad'lé mi, dji m' sintiraî pus à m'-n-auje !
- Gusse. Come vos v'lez.

Sin.ne 2 : Bèbèrt – Gusse – Aumaye

- Aumaye. (qui intère) Bondjoû, dji su bin amon Mossieû Albèrt Roncin ?
- Bèbèrt. Ayi, c'èst mi. Èt voci m' camarâde Augusse Bèdot.
- Gusse. Bondjoû.
- Aumaye. Bondjoû.
- Bèbèrt. Djè lî aî d'mandè di d'meurè, ça n' vos disrindje nin ?
- Aumaye. Bin seûr qui non.
- Bèbèrt. C'èst qui vèyez, dj'in.me bin mès-abitudes savez mi. Dji n'in.me nin d' candji d' docteûr come on pour candji di tch'mîjes. Mins v'la, li mène è-st-en condji èt i n' rivint qui dins deûs samwin.nes.
- Aumaye. Dji vos comprend. Vos n'aurez qu'à m' dîre si nom èt djè lî èvoyeraî in rapòrt. Adon, qwè-ce qui dj' pou fé por vos ?

- Bèbèrt. Bin vola ! C'èst malauji à spliqui savez. Gn-aureut qu' mi, vos pinsez bin qui dj' m'è foutereut. Mins Marguerite lèye, èle n'èst nin binauje.
- Aumaye. Marguerite ?
- Gusse. Mètez-vos à s' place ! Èle voureut bin qu'il fait pus sovint mins i n'î arive pus !
- Aumaye. Oh là, ça n' va nin ièsse auji ! Dji n'aî nin l'abitude avou lès grossès bièsses savez mi !
- Bèbèrt. (à paurt) Grosse bièsse ! Dji m' va li è foute savez mi dèss grossès bièsses !
- Aumaye. Enfin, dji m' va fé m' possibe. Pou in preûmî, i faureut sawè s'i n'èst nin trop vîy. Pace qu'ossi non, i n' faut nin balzinè. On l'èvoÿe à l'abatwêr èt on z-î mèt in djon.ne à l' place.
- Bèbèrt. (à paurt) À l'abatwêr ... in djon.ne ... (à Gusse) Èt, vos-èstèz seûr qu'il î conèt ène saqwè ?
- Gusse. Gn-a pont d'ôtes solucions ? I n'èst nin si vîy qu' ça savez !
- Aumaye. Quékefiye bin qu'avou saquantès piqûres d'ormones, on poureut awè in résultat. Dj'aî ieû l' cas l'ôte djoû avou in Danwès. Mins l' problin.me c'èst qu'après, i gn-aveut pus moyin dè l' tinu. I pèteut èvoÿe tos lès djoûs èt i n' rintreut qui taurd dins l' swèréye. D'alieûrs, li feume a fait arètè l' traitemint pace qu'èlle ènn aveut s' sô d' couru après.
- Gusse. (à Bèbèrt) Pou ça Marguerite èlle a d'djà l'abitude d'alè vos r'qué au cabarèt.
- Bèbèrt. Èt après, qwè-ce qu'i s'a passè ?
- Aumaye. Èle l'a fait piquè èt èlle a pris in Pékinwès.
- Gusse. C'è-st-ène saquî qu'in.me bin lès-étranjers.
- Bèbèrt. Ah non hin. Nin quèstion d' vèy Marguerite avou in Pékinwès !
- Aumaye. Ça, dji m'è doute ! Mins vos pourîz quékefiye vèy du costè dèss Limousins ou bin dèss Charolais. I gn-a dèss fameûs spécimens aaurlà.
- Bèbèrt. Ni Pékinwès, ni Limousins, ni Charolais ! Mi feume ni vwèt voltîy qui lès Walons.
- Aumaye. Adon, r'pèrdez z-è èn-ôte. Ça vos fra mwins' di frais qui d' sayi dè l' rimète su pîd.

- Gusse. Vos pinsez qui c'est l' mèyeûse solucion ?
- Aumaye. Bin seûr ! S'i n'î arive pus, c'est qu'il a d' l'âdje oudoubin ène malformacion. Pèrdez in djon.ne à l' place èt vos-aurez du rendemint. Di pus, si vos-avez ène bièsse di concoûrs, on l' vos dimandera di tos costès èt l'afaîre divinra intèrèssante. Ça rapôrte bin savez !
- Bèbèrt. Si dj' comprind bin, li grosse bièsse ni vaut pus rin qwè ! Gn-a pus qu'à l' mwinrnè à l'abatwêr !
- Aumaye. Alez mossieû Roncin, faut nin fé in drame pou ça ! Ça arive tos lès djoûs.
- Bèbèrt. Quékefîye bin amon lès-ôtes ! Mins por mi, c'est l' preûmî côp ! Èt dji n' su nin prèsse à l'avalè !
- Gusse. Mètez vos à s' place ! Ça fait in choc tos l' min.me.
- Aumaye. Alez, si vos v'lez, on va quand min.me fé ène saye. Mins i n' faura nin m'è v'lu s'i gn-a dès problin.mes avou lès vijins. Èyu-ce qu'il èst?
- Bèbèrt. Qui ça ?
- Aumaye. Bin, vosse tauria !
- Gusse. Bin, gn-a pont d' tauria vèci. Douvint-ce qui vos causez d' tauria ?
- Aumaye. Bin, à cause di Marguerite.
- Bèbèrt. Marguerite ? Bin c'est m' feume !
- Gusse. Èt l' grosse bièsse, c'est li !
- Aumaye. Oh la, gn-a ène saqwè qu' dji n' comprind pus. Vos n' mi causîz nin d' vosse tauria ?
- Bèbèrt. Ça s'reut malauji vu qu' dj'ènn n'aî pont. Non.na, dji vos causeu d' mi.
- Aumaye. I dwèt î awè in malintindu savez. Dji n' su nin médecin mins vétérinaîre.
- Gusse. Portant, dj'aî trovè vo numéro dins l' rubrique dès doctèûrs.
- Aumaye. Ayi, mins doctèûr en médecine vétérinaîre. Dji su in doctèûr pou lès bièsses.
- Bèbèrt. Tos comptes fait, dj'in.me mia ça. Ça n' mi d'jeut rin d' mi r'trovè à l'abatwêr.

Li grosse bièsse

- Gusse. Mins come vos-èstèz doctèûr pou lès bièsses, vos-èstèz doctèûr quand min.me. Vos n' saurîz nin fé ène saqwè pou m' camarâde ?
- Aumaye. Oficièlemint, non ! Mins vos savez, si i n' pout pus l' fé pou l' momint, i d'vreut quékefiye prinde dès-afrodisiaques. Du Gingembre, ou bin dès céleris, ça n' poureut nin li fé du twârt.
- Bèbèrt. Ah mins di s' costè là, ça va. C'èst pou m' courti. Dji n'î arive pus. À chaque côp qui dj' douve li baurîre, dj'aî come in blocadje èt i faut qu' dji m'èrva.
- Gusse. Èt c'èst pou ça qui s' feume l'a maneci d' prinde ène saquî pou l' fé à s' place.
- Bèbèrt. Èt ça, dji n'î tins nin ! M' courti, c'èst sacré.
- Aumaye. Pou ça, dji n' pou rin fé... À mwins' qui ...
- Bèbèrt. Qui qwè ?
- Aumaye. Pinsez à l'abatwêr !
- Bèbèrt. Oh, boune idéye tins ça ! ... Dji m' sin come èn-ôte ome ! Li courti ou l'abatwêr ... Dji m' va au courti ! (i vûde)
- Gusse. Èt bin doctèûr, dji pinse qui vos l'avez guéri ! Combin-ce qu'i vos dwèt ?
- Aumaye. Rin, ça m' faît plaiji d' li awè rindu sièrvice. Èt d' pus, ça m' fra ène saqwè d' gaîy à racontè.
- Gusse. Tos comptes faît, on z-a bin faît d' vos hukè ! On pout bin dîre qu'i gn-a rin d' mia qu'in vétérinaire pou sognî ène grosse bièsse ! Alez, v'nez avou mi, dji vos paye in vère !

Ridau

Tirades :

- Bèbèrt. 30
- Gusse. 25
- Aumaye. 23